

清光緒朝中日交涉史料

卷七五之卷七六

光緒卅年東事收電檔

清光緒朝中日交涉史料卷七五東事收電檔

(五五九三)收北洋大臣致軍機處外務部電

光緒二十九年十二月三十日

據奉省探稱廓米薩爾照會增將軍札飭地方官幫同辦理一切並請給護照十八張赴蒙古各處購馬及需用之物云謹轉達世凱肅卅

(五五九四)收直督致外務部電

十二月三十日

宣守局外詔頒數日而條規尙未頒行官民莫知遵守恐有誤會凱已遵照大部迭次函電將原訂條規局外地界及續購煤斤兩條刪去其不得偏售一條亦經改正業將禁令各節電知直隸山東各屬先行遵守又作爲大部頒發將改定條規刊印多本並刷印告示以備分行謹先聲明世凱敬肅卅

(五五九五)收南洋大臣致外務部電

十二月三十日

勘電悉日前曾經甯滬日領飛電相告有俄船在滬添裝藥彈並以日船均早離口俄船亦應令其出口當先後電查旋據滬道電復在口俄國滿洲兵輪停泊已久現因修理船桅近

靠碼頭並未添裝藥彈稅司查復相同已與俄日兩領會商辦法俄船既慮日船要挾即修竣亦恐難遽出口現復電滬道務照公法如何限制不使出而助戰速與兩領商定辦法以免藉口之處謹復肅鑒

(五五九六)收駐德廕大臣致外務部電 十二月三十日

二感電均已轉達德外部矣聞德國亦定守局外之例特稟聞廕昌鑒

(五五九七)收出使俄國大臣致外務部電 十二月三十日

感沁電均照譯面交外部並剴切申說據稱中國恪守局外俄決不侵越惟東三省及蒙古東北隅鐵路所經爲運兵用兵要地勢難認爲局外須與兵部阿列商定界限再爲覆云此間一切消息梗阻秘密稽查綦嚴探訪殊難電報亦多壓閣幸常賜電德鑒宣轉

(五五九八)收庫倫辦事大臣德麟致外務部電 十二月三十日

據恰克圖委員等報稱現在邊境平安密探得俄人於十二月二十五七等日在恰克圖佔

營挑兵五百名風聞此次俄人由鐵路發往東去之兵共六千餘名隨後再由波爾斯克派去二千名並聞俄船在朝鮮海面被日本由岸擊沈三隻傷人兩萬餘等語合卽開麟豔

(五五九九)收滬道致外務部電。十二月三十日

豔電敬悉兵輪滿洲事已詳昨電定邀垂察該兵輪久泊浦江並非近日進口查無購辦軍火英領亦未干預惟各國兵艦向泊浦江中洪今該兵輪因修船桅商由稅司准暫靠近碼頭究非所宜迭經職道商令移回江渡並派洋扞查禁私裝軍需以免日本藉口務懇轉致俄使飭遵至叩樹勳卅

(五六〇〇)收滬道致外務部電 十二月三十日

勘電敬悉俄日宣戰我國應守局外例查禁購辦軍需先經職道函囑稅司照辦現又欽遵上諭與律法官酌擬訓條稟請南洋分飭海關礮台一體恪守一面由職道切示曉諭至俄兵船滿洲停泊已久昨准日領以該船添裝藥彈卽向俄領詰問該輪應修船桅靠近碼頭並未添裝藥彈復詢稅司查復相同當又囑其駛出口外據稱船小兵單恐爲日所獲如必

欲駛出須保險廿四鐘不幸有事卽向中國索賠商諸日領日又以兵艦不同商船不能允許致妨敵國權利意在禁其接濟並不限令出口遂與兩領熟商將該兵艦移泊江心聽其何時開駛但請稅司專派洋扞駐守該艦嚴禁裝載軍火除兵弁日用外卽載煤亦以近地口岸爲准不能多裝謹將大略稟復樹勳鑒

(五六〇一)收東海關道致外務部丞參各堂電 十二月三十日

英督向俄督索回温州輪頃抵烟載日人約三百華人十餘據稱連日俄艦守口日艦挑戰俄臺礮拒前次俄兩鐵甲損已修好壹快船難修仁川俄貳艦實被日擊逸去旅順一帶華工匠仍安舊業華商欲行俄官慰留云敬乞代回各堂憲恭賀歲禧昇稟卅

(五六〇二)收西歷二月十四日由滬來路透電 十二月三十日

日人之勝令俄京有如此惶恐庫款甚爲緊急官銀行大受虧折又數銀行欲行倒閉俄戰艦底米拉黨斯齊敖婁拉與快船六艘開往蘇彝士河載煤並在該處停泊至十三日以待歐斯里巴戰艦薩拉陶夫運船與快船三艘刻下此船及運船魚雷各船均由蘇彝士開行

矣阿總督來電云安西魚雷艇誤爲旅順口海下之雷轟沈守備司台卜闊甫與官三員人九十二名均不見俄國滅魚雷艇經政府查驗後均令由塞得口開行俄國請將快船送入蘇彝士船塢爲人推却奧國所僱前往旅順之煤船扎瓦俄人視爲戰船並令其卸煤後速離塞得海口阿總督來電云戰艦受傷甚重難言何時修好再赴海面其餘受傷各船約自三日至十四日皆可修齊又赴海面日人現已佔據漢城俄國南方叛黨漸增各省巡撫皆召赴俄京議事華德兩國皆宣明局外之例

(五六〇三)收盛京將軍奉天府尹致外務部電 正月初一日

頃聞日有登陸據金州毀該處鐵路之說未識確否惟日內火車運俄眷盡往北方不載華人故得確信甚難北路尤滯刻省西大石橋俄已設卡增祺廷杰豔

(五六〇四)收錦州副都統致外務部電 正月初一日

昨奉電音除謹守局外公法外並嚴飭認真防範土匪合先電復昌

(五六〇五)收北洋大臣致外務部電 正月初一日

卅電敬悉當將各條先電南洋通飭遵守恭賀新禧世凱肅東

(五六〇六)收山東巡撫致外務部電 正月初一日

頃得青島電德兵輪自旅載洋商三十六人歸探聞旅大食物甚缺俄兵傷九船二可修勢弱不出日船已離旅駐韓又據日人言前數日俄船四自海參崴過北海峽青森沖地方被日擊沈三其一不知所往現東海除旅順外別無俄船云查旅大食物向多買自煙台照北洋頒本內云局外之國仍與兩戰國通商除軍需不賣外其餘食物俱照常賣擬照此辦並望將局外例速示周馥卅

(五六〇七)收署貴州巡撫致軍機處請代奏電 十二月三十日

臣李經羲跪奏竊臣昨上密奏力陳中立之名暫不得不居中立之實誠不可自誤蓋以禍始吾遼我爲戰地非獨後患無窮卽目前亦難紓急禍也電奏甫上卽恭奉宣明中立之諭旨意者朝廷爲鎮靜人心慎全交涉而設事關切要臣自當慎密防維惟廟堂隱旨若何殊

非數千里外所能仰測儻以是即可自全一切不爲戒備以臣之愚實未敢信臣午夜焦思
既欲暫居中立又冀急紓眉禍似惟有速向各國切商禁止日俄兩國除東三省外不得在
中國南北水陸各境行兵交戰如各國能力主其事公同照會日俄日俄兩國均肯實在遵
允或者尙資補救在中國能藉此寬鬆一步切實慎固封守趕緊分道練兵以防瞬息之他
變而爲觀釁之深謀在各國顧全商局圖保利益似亦樂爲萬一此策不先或行之而日俄
不遵或名遵而實不奉則除專意備戰之外實無暫全善策矣冒瀆密陳伏乞聖鑒訓示謹
請代奏李經義謹叩

(五六〇八)收署貴州巡撫致軍機處請代奏電 十二月三十日

臣李經義跪奏日俄宣戰我爲地主實偏處此若猶意懷首鼠不早決計姑無論戰定要責
無己無以立國卽目前任人私毒聽人襲據受人箝制不待戰畢我已破壞不堪日小俄大
日卽得英美暗助戰勝俄猶在也豈不知力難持久仇無已時而顧不待噬臍毅然決戰者
亦恐卽今不挫養成大勢後將求戰不得矣况我處積弱禍至迫切猶望俄於席捲之餘憐
而容我耶夫俄德法虎狼也英美日狐兔也狐兔得肉可止虎狼則無飽壓故俄勝勢必吞

并日勝無非索酬兩害相形則取其輕與其畏俄而不許何如親日而變成查俄在東方海陸各軍均不如日又有土耳其牽制備多力分此論局勢日當勝俄日持義甚正通國臣民同仇偕作俄則權臣主戰國民不與日以小禦大列邦壯之久戰或挫援者必多俄則陰狼而貪外以強大遭嫉內則嚴酷啓猜若久驅血肉於鋒鏑必有乘機構亂者德法雖與聯盟然見利卽趨知難則已耳親密實不如英日此論情理日當勝俄舍理勢則得而不附在我爲失機矣昔秦剪六國舍近攻遠舍弱圖強齊爲所欺終就滅絕今俄之待我猶秦視齊前此以詐術墮牢籠悔已無及此時俄不爲戎首殆猶欲不血刃而竟前謀奈爲日窺破迫而爲戰臣愚以爲俄必羈我而後圖日其策有二一則虛聲恫喝甘言誘許交致其用要以誓約使我旣懷恐懼又存繫戀絕不敢輕於一動彼乃得縱橫如意專力於人一則戰陣方交卽先乘我不備突以重兵扼我近要制我肘腋使關外有所顧忌不加一矢所謂以一舉省無窮之備是也或且暗結法人嗾使桂匪重擾邊境牽制川廣湖湘援應之師不及北巡二者皆出狡智均宜急防臣亦知我無可恃兵凶戰危然俄日旣以我爲戰地矣不助日仍無全理助日則或有倖望卽我力不及苟能自固卽助日矣臣意調停者必主中立謂可冀兩全豈知公法必盡却外兵使戰境外乃爲中立今則日俄因芻糧於我恃險塞於我驅力役

於我容日則俄惡容俄則日惡兩容則日俄交惡何爲中立且日之修戰實雖自謀名則顧我若終於膜視人皆吐棄不獨日怨也縱今日能諒我而功成獨居索酬必重何若與之偕作異日猶可爲詞熟審目前時勢卽我實能中立猶爲自昧機宜况並此不能而欲空言假託冀免侵陵何可倖耶惟此時我兵太弱欲驅俄師於東境力實不逮卽顯與構難亦恐不敵計惟有陽爲鎮靜陰嚴戒備暗告日人惟力是視俄若要約則權詞應之日旣知我意決計事必密相關會我則勤爲伺察俟俄力疲情蹙乘瑕蹈隙突起圖之以巧補拙或得一當若因其暫不擊我而遂懷偷安緩禍轉瞬失機我爲蠶粉矣抑臣更有請者近今非權力不能自固非預練精兵斷無權力其他強國新政收效不及似宜節一切費用專備練兵雖此時行之已遲勢難驅烏合以當強敵然逆料戰局一開兵端必久我處危地亟宜擇人分畀並日簡練備將來急難應援山海關及俄兵東行要道尤宜屯練重兵名則固防實掣俄肘觀釁而動一面嚴飭各疆臣速練勁旅數千人庶明年秋冬當得數萬兵可用臣世受國恩義當效死如蒙飭遣俾得解任馳赴長淮挑選樸健鄉丁專練一軍訓練三月擇地積屯期年當可備戰否則畀臣以籌餉之區徵兵之地雖爲官守所牽而事事不仰人鼻息亦尙可竭智以圖若僅就黔謀之無餉無兵無械用力殊艱見功較緩然臣亦不甘退讓擬挑募苗

勇三四千人親督訓練半年後如戰事未已卽率赴前敵效命惟餉械萬難猝備擬懇恩電飭四川湖南各借餉銀二十萬兩爲成軍初餉及購械製裝之用如蒙俞允所借川餉臣擬於議辦行黔川鹽加價款內三年攤還湘餉擬於該省協黔額餉四年扣還均不至久懸無著至以後常餉所需甚鉅臣當竭力設籌卽毀家亦所不惜並求准臣奏調各省得力兵弁十餘員嚴旨飭赴庶免延誤臣擬練此軍實欲內外兼顧俄難既作雲南廣西法必爭據若收合游匪前驅勢更難禦有此一軍控制卽幸而北方事定亦可藉盪游氛冒瀆密陳伏乞訓示謹請代奏李經羲謹叩

(五六〇九)收安徽巡撫致外務部電

光緒三十年正月初一日

感電敬悉中國謹守局外宣告必不可少照會詞嚴義正仰見鴻謨勳已通飭所屬並將電抄諭旨恭錄曉諭俾資鎮定仍嚴督文武認真防護現皖省閭閻靖謐堪紓憂慮勳卅

(五六一〇)收美澳亞非四洲旅民呈外務部電

正月初一日

俄橫佔東三省天下憤怒日本仗義興師我豈可坐視以啓外人瓜分之心祈代奏聯日戰

俄趁勢恢復東三省與日本表裏攻俄破之可必商民等人數百萬願助軍餉美洲澳洲亞洲非洲旅民等叩

(五六一一)收天津路透電 正月初一日

三十日路透電倫敦西二月十四號電即華十二月二十九日遠東總督阿力西夫電政本國云各鐵甲戰艦既受重傷現雖趕修何時再能出海殊難預定其餘各艦亦須數日或半月方能出海日本已踞韓地方日本之勝殊於俄京商務大有關係收售國債票者賠累甚多銀行多家亦岌岌將有倒閉之虞俄國戰艦二艘一名喀士海一名亞羅拉並攻雷艇四艘已在蘇以士河開行抵基柏第地方裝載煤斤停泊數天等候戰艦一艘巡艦一艘並攻雷艇三艘然後起程俄國有水電艇數艘現在蘇以士河俄國南省人心變亂之機日增一日各總督撫已調京會商矣日俄戰事德國中國已備咨文嚴守局外

(五六一二)收上海路透電 正月初一日

西二月十六號即正月初一日夜兩點二十分總督阿利克塞夫云滿洲松花江地方鐵

路暨橋被攻幸早爲覺察遂卽嚴行防守美國海大臣請認中國守局外之文亦蒙法國允從英國亦以其所擬辦法合理想俄國亦必無異議矣日本雖明知與中國聯合有益而在巴黎所發之日本公文則云日本已勸中國守局外之例以輕戰禍於至微故日本力勸中國實力嚴守以免日俄兩國用中國口岸或爲戰場或作退藏之地有犯中國局外之例

(五六一三)收北洋大臣致軍機處外務部電 正月初二日

奉探稱俄兵千餘人礮二十八尊並由奉省抽二百兵同南去俄眷口九百餘並帶傷亡官兵行車四輛同北去俄有受傷兵五百餘擬借奉省大學堂爲醫院又電傳聞金州已被日攻佔阿提督受傷不日往奉省車站駐紮俄將調兵四十萬與日決戰俄節節設卡盤查甚嚴華人暨郵信均不准附火車等語謹轉達世凱肅冬

(五六一四)收伊犁將軍致軍機處外務部請代奏電 正月初二日

欽奉念七日諭旨已欽遵督屬妥辦伊犁安塔如常現在可保萬全祈代奏上慰聖念亮送

(五六一五)收上海路透電

正月初二日

西二月十七號即中正月初二日早三點十分總督阿利克塞夫傳諭將滿洲境內日本人民拏獲送交旅順現在日本已將此節控訴於美國求其代爲干預俄國公文云在十四號旅順情形依然如舊現在華盛頓接得消息云自西二月十四號以來日本軍隊已在仁川登岸者幾有二萬之多英國下議院阿喀爾君詢問俄國會否以黑海水師經過達爾丹迺拉斯一節商之英國諒俄國必不欲違犯約條也聖彼堡政府現因學生怖言煽惑民心所出傳單故意甚憂悶

(五六一六)收北洋大臣致軍機處外務部電

正月初三日

奉探電稱俄在遼陽強佔民房接拏車輛將有大兵來駐俄兵四百餘名昨入瀋城連日載馬兵一千三百步兵三千南去安東岫巖新到兵五千分布防守鎰重屯鳳城聞日兵已抵韓國松帖旅順亡在旦夕俄欲退紮遼陽候大兵到再進云謹轉達世凱肅江

(五六一七)收盛京將軍奉天府尹致外務部電

正月初三日

二十九接來電當照知阿大臣及廊米薩爾並將通飭嚴防匪徒不使擾及鐵路電杆中國人命財產俄隊所經處亦應恪守紀律弗稍偏損等因照會去後茲准廊米薩爾照稱中國於日俄開仗時嚴守局外之例遠東大臣深爲允許第既守局外鐵路兩旁及駐紮開仗之隊各處六十俄里內不得駐華隊並不得放入可疑之人其原有華隊限四日退出如在六十里內駐隊即係毀壞遵守局外之例而敵國軍隊不以局外視之等語當飭員向該俄員力加辨論彼堅執不允自應再向加意磋商第其意甚堅倘仍不允應如何辦理祈急電示頃又云阿提督病回由旅至瀋駐紮增祺廷杰冬

(五六一八)收天津路透電 正月初三日

本日接路透電倫敦西二月十七號華正月初二日俄國國家已發出國債票五千萬盧布每盧布約值洋一元俄國戰艦三艘水雷艇數艘已奉命在爵卜特地方在紅海法屬之埠停泊聽候調度俄京傳聞日本現遣艦隊保護陸兵向遼東灣進發勢必有截斷旅順鐵路之意俄京傳聞俄屬土其士丹總督某提台已奉本國之命倘英國在波西及西藏地方擅用兵力損俄利權我國亦必預備用兵於印度以報之正月初三日

(五六一九)收上海路透電 正月初三日

俄政府現出昭信票至五十兆盧卜之多俄戰艦歐里斯巴敖婁拉底米拉黨斯齊並魚雷船數艘派往塞包地爾停泊以待來命聖彼德堡傳云有日兵大隊乘巡船往遼東灣在日人之意欲斷附近旅順一帶鐵路

(五六二〇)收上海路透電 正月初三日

西二月十八日下午六鐘五十五分俄京傳云西域巡撫番那夫現已奉命盡力備辦軍務恐英國在印度有明戰拒俄之事或在波斯及西藏等處有損俄人權利之舉

(五六二一)收天津路透電 正月初三日

今日接路透電倫敦西二月十五號華十二月卅日遠東總督阿力西夫電報俄國云運水雷砲之輪船在旅順誤撞自安之暗雷而沉船主管駕水手人等九十六人全行漂沒俄國攻雷艇一艘在波西特地方蘇以士河北口已被該處地方官按局外之例飭令出境俄國

懇英准該艇在蘇以士河入塢修整英國不允所請奧國煤船名查發因包運旅順煤斤現在波西特地方卸貨已由該地方官按公例令其離港法國已收美國政務大臣擬請中國當堅守局外之照會英國亦已允之大約俄國亦諒無不從日人在法京傳報謂日本會請中國嚴守局外以免戰禍株連雖中日連爲一氣於日不無裨益惟謹守局外可保利權而免相爭之國藉詞侵犯且可免戰時各艦駛入口岸致遭蹂躪遠東總督阿力西夫云日人屢次規犯東三省鐵路并松花江橋惟經我國時刻注意現已嚴行保護矣西二月十六號又電英政務大臣云下議院宣說云俄國尙未咨請我國准其黑海艦隊出大甸泥爾士海峽按英俄前約俄國艦隊出峽須有定數不得違限我英亦不必疑俄有違背此約之事俄京官場頗形焦灼因學堂學生張掛有悖逆揭帖搖動人心遠東總督阿力西夫曾飭將東三省之日人全行捕獲解交旅順辦理日本政府咨請美國代爲理論俄人有文致本國云自西二月十四號至今旅順兵事尙無變動美京近得消息以日本陸兵二萬名於西二月十四號在仁川登岸矣